

Jual tapak Pasar Ramadan berunsur rasuah - SPRM
Malaysian Insider
July 10 , 2013

Suruhanjaya Pencegah Rasuan Malaysia (SPRM) memberi amaran kepada peniaga bazar Ramadan supaya tidak ambil kesempatan dengan menjual lot tapak mereka.

Pengarah Bahagian Pemeriksaan dan Perundingan SPRM, Datuk Mohamad Yusoff Akope, berkata perbuatan mengalibabakan perniagaan mereka juga elemen rasuah.?

"Kami bekerjasama dengan Dewan Bandaraya Kuala Lumpur (DBKL) pantau perkara itu. Peniaga menandatangani surat akujanji dedikasi untuk tidak terlibat dengan apa-apa unsur rasuah.

"Apabila ada tawaran, ia boleh disifatkan sebagai unsur sogokan. DBKL juga ada tetapkan peraturan pemilik tapak tidak boleh memindah milik atau menjualnya.

"Sebarang penjualan dianggap amalan rasuah dan boleh diambil tindakan," katanya dipetik dari akhbar berbahasa Melayu, Sinar Harian.

Menerusi Akujanji Penganjur Bazar Ramadan 2013, klausa itu menyebut 'Saya berjanji tidak akan terlibat dalam sebarang perlakuan rasuah sepanjang urusan saya dengan pihak terbabit yang ada kaitan dengan urusan tapak bazar Ramadan dan saya sedar, saya boleh diambil tindakan di bawah Akta Suruhanjaya Pencegahan Rasuah Malaysia 2009 jika saya terlibat dalam perbuatan tersebut'.

Dalam tempoh lima tahun, Yusoff berkata, pihaknya menerima lebih 20 aduan mengenai pengagihan tapak bazar Ramadan khususnya di Jalan Tunku Abdul Rahman dan Masjid India.

"SPRM adakan beberapa siri rundingan dengan DBKL untuk bendung isu penjualan tapak bazar. Kami sepakat apabila DBKL menerima syor SPRM untuk mansuhkan 58 tapak kuota khas menteri dan 44 kuota khas persatuan di bawah DBKL," katanya.?

Beliau berkata, kuota khas itu menjadi isu besar peniaga apabila terdapat aduan tapak bernilai tinggi dijual dengan harga RM20,000 sehingga RM30,000.

Hakcipta © 2013 The Malaysian Insider

Source:

<http://www.themalaysianinsider.com/bahasa/article/jual-tapak-pasar-ramadan-berunsur-rasuah-sprm/>